

摘藻堂四庫全書薈要

集部

欽定四庫全書薈要

集部

淦水集卷一

二

臣董誥詳校

詳校官助教臣謝登雋



欽定四庫全書薈要

滄水集總目

卷一


大學

卷二

古賦

卷三

古詩



卷四

古詩

卷五

古詩

卷六

律詩

卷七

律詩

卷八

律詩

卷九

律詩

卷十

雜體

卷十一

碑文

卷十二

碑文

卷十三

記

卷十四

論

卷十五

引

卷十六

頌

卷十七

箴

銘

贊

卷十八

祭文

卷十九

書啟

卷二十

題跋

臣等謹案滏水集二十卷金趙秉文撰秉文
字周臣自號閒閒道人滏陽人大定二十五
年進士歷官翰林侍讀學士拜禮部尚書事
迹具金史本傳元好問中州集稱其自幼至

老未嘗一日廢書著易叢說十卷中庸說一卷楊子發微一卷太元贊六卷文中子類說一卷南華畧釋一卷列子補注一卷刪集論語孟子說各十卷資暇錄十五卷今皆未見殆多散佚惟此集存史稱所著詩文三十卷此本乃二十卷與史互異然篇目完具不似有所佚脫考中州集稱東文所著文章號滏水集者前後三十卷則二十卷為前集十卷

為後集此本乃其前集故僅二十卷而其後
集則佚耳金蕭真卿嘗曰國初文士如宇文
大學蔡丞相吳深州等不可不謂豪傑之士
然皆宋儒難以國朝文派論之故斷自蔡正
甫為正傳之宗党竹谿次之禮部閒閒公又
次之當時以所論為允正甫蔡珪字竹谿党
懷英號也今珪與懷英集皆不傳則金源一
代之集茲其巨擘矣乾隆四十三年四月恭

校上

總纂官臣紀昀臣陸錫熊臣孫士毅

總校官臣陸費墀

欽定四庫全書薈要卷一萬六千四十三

集部

淦水集卷一

金 趙秉文 撰

大學

原教

夫道何為者也總妙體而為言者也教者何所以示
道也傳道之謂教教有方內有方外道不可以內外
言之也言內外者人情之私也聖人有以明夫道之
體窮理盡性語夫形而上者也聖人有以明夫道之

用開物成務語夫形而下者也是故語夫道也無彼
無此無小無大備萬物通百氏聖人不私道道私聖
人乎哉語夫教也有正有偏有大有小開百聖通萬
世聖人不外乎大中大中外聖人乎哉吾聖人之所
獨也仁者人此者也義者宜此者也禮者體此者也
智者知此者也信者誠此者也天下之通道五此之
謂也五常之目何謂也是非孔子之言也孟子言四
端而不及信雖兼言五者之實主仁義而言之於時

未有五常之目也漢儒以天下之通道莫大于五者
天下從而是之揚子曰事繫諸道德仁義禮闢老氏
而言也韓子以仁義為定名道德為虛位闢佛老而
言也言各有當而已矣然自韓子言仁義而不及道
德王氏所以有道德性命之說也然學韓而不至不
失為儒者學王而不至其蔽必至為佛老流而為申
韓何則道德性命之說固聖人罕言之也求其說而
不得失之緩而不切則督責之術行矣此老莊之後

所以為申韓也與過於仁佛老之教也過于義申韓之術也仁義合而為孔子孟子法先王荀卿法後王荀孟合而為孔子

性道教說

性之說難言也何以明之上焉者雜佛老而言下焉者兼情與才而言之也佛則滅情以歸性老氏則歸根以復命非吾所謂性之中也荀卿曰人性惡揚子曰人性善惡混言其情也韓子曰性有上中下言其才也非性

之本也記曰人生而靜天之性也又曰中者天下之大
本也此指性之本體也方其喜怒哀樂未發之際無一
毫人欲之私純是天理而已故曰天命之謂性孟子又
于中形出性善之說曰惻隱也羞惡也辭讓也是非也
孟子學于子思者也其亦異于曾子子思之所傳乎曰
否不然也此四端含藏而未發者也發則見矣譬之草
木萌芽其茁然而出者必直間有不直物礙之耳惟大
人為能不失其赤子之心此率性而行之者也故謂之

道人欲之勝久矣一旦求復其天理之真不亦難乎固當務學以致其知先明乎義利之辨使一事一物了然吾胸中習察既久天理日明人偽日消庶幾可以造聖賢之域故聖人脩道以教天下使之過人欲存天理此脩道之謂教也孟子之後不得其傳獨周程二夫子紹千古之絕學發前聖之秘奧教人于喜怒未發之前求之以戒慎恐懼於不見不聞為入道之要此前賢之所未到其最優游乎其徒遂以韓歐諸儒為不知道此好

大之言也後儒之扶教得聖賢之一體者多矣使董子揚子文中子之徒游於聖人之門則游夏矣使諸儒不見傳注之學豈能遽先毛鄭哉聞道有淺深乘時有先後耳或曰歐韓之學失之淺蘇氏之學失之深其如雜而不純何曰歐蘇長於經濟之變如其常自當歸周程或曰中庸之學孔子傳之曾子曾子傳之子思而後成書不以明告羣弟子何也曰詩書執禮皆雅言也雅言猶言素所言耳至於天道性命聖人所難言且易之一

經夫子晚而喜之蓋慎言之也孟子不言易荀卿曰始
乎為士終乎讀禮於時未嘗言易後世猶曰孟子不言
易所以深言之也聖人於尋常日用之中所語無非性
與天道故曰吾無隱乎爾但門弟子有不知者迨子貢
曰夫子之言性與天道不可得而聞也子貢聞一貫之
後蓋知之矣然亦未嘗以窮高極遠為得也自王氏之
學興士大夫非道德性命不談而不知篤厚力行之實
其弊至于以世教為俗學而道學之弊亦有以中為正

位仁為種性流為佛老而不自知其弊反有甚於傳注之學又不可不知也且中庸之道何道也天道也大中至正之道也典禮德刑非人為之私也且子以為外是別有所謂性與天道乎吾恐貪高慕遠空談無得也雖聖學如天亦必自近始然則何自而入哉曰慎獨

中說 并引

蘇黃門云喜怒哀樂之未發謂之中即六祖所謂不思善惡之謂也發而皆中節謂之和即六度萬行是

也藍田呂氏曰寂然不動中也赤子之心中也伊川又云性與天道中也若如所論和固可位天地育萬物矣只如不思善不思惡寂然不動赤子之心謂之中果可以位天地育萬物乎又言性與天道中也何不言喜怒哀樂未發謂之性與道耶或者謂物物皆中且不可溟滓其說請指眼前一物明之何者謂中只如權衡亦中之類如何得雜佛老之說而言之而明聖人所謂中也或云無過與不及之謂中此四者

已發而中節者也言中庸之道則可言大本則未可
若然則寂然不動赤子之心皆中正也非耶

試論之曰不偏之謂中不倚之謂中中者天下之正理
夫不偏不倚之理似涉於喜怒哀樂已發而中節者也
然未發之前亦豈外是哉學者固不可求之於氣形質
未分之前老胞胎未具之際佛只於尋常日用中試體
夫喜怒哀樂未發之際果是何物耶此心未形不可謂
有必有事焉不可謂無果喜與果怒與喜怒且不可得

尚何過與不及之有耶亭亭當當至公至正無一毫之私意不偏於一物當是時不謂之中將何以形容此理哉及其發之於人倫事物之間喜無過喜喜所當喜怒無過怒怒所當怒只是循其性固有之中也其間不中節者人欲雜之也然則中者和之未發和者中之已發中者和之體和者中之用非有二物也純是天理而已矣故曰天命之謂性中之謂也率性之謂道和之謂也所以不謂之性與道者蓋中者因無過與不及而立名

所言中以形道與性也言各有當云耳何以知其為天
理今天地之化日月之運陰陽寒暑之變四時不相
貸五行不相讓無適而非中也大夏極暑至於鑠金而
夏至一陰已生隆冬祁寒至於凍海而冬至一陽已萌
庸非中乎后以財成天地之道輔相天地之宜經綸君
臣父子兄弟夫婦朋友之大經不亦和乎由是而天地
可位萬物可育此聖人致中和之道也曰然則中固天
道和人道與曰天人交有之乾道變化各正性命中也

保合太和乃利貞和也民受天地之中以生中也能者
養之以福和也然則寂然不動赤子之心非中歟曰皆
是也方喜怒哀樂未發之時不偏不倚非寂然不動而
何純一無偽非赤子之心而何直所從言之異耳但蘇
黃門言不思善不思惡與夫李習之滅情以歸性近乎
寒灰槁木雜佛而言也佛老之說皆非與曰非此之謂
也天下同歸而殊塗一致而百慮殊塗同歸世皆知之
一致百慮未之思也夫道一而已而教有別焉有虛無

之道有大中之道不斷不常不有不無釋氏之所謂

中也

中論有五百問

彼是莫得其偶謂之道樞樞始得乎環

中以應無窮老莊之所謂中也非吾聖人所謂大中
之道也其所謂大中之道者何也天道也即禹湯文武
周孔之道也書曰執厥中易傳曰易有太極極中也非
向所謂佛老之中也且雖聖人喜怒哀樂亦有所不免
中節而已非滅情之謂也位天地育萬物非外化育離
人倫之謂也然則聖人所謂中者將以有為也以言乎

體則謂之不動以言純一則謂之赤子以言稟受則謂之性以言共由則謂之道以言其修則謂之教以言不易則謂之庸以言無妄則謂之誠中則和也和則中其究則一而已矣

誠說

夫道何為者也非太高難行之道也今夫清虛寂滅之道絕世離倫非切於日用或行焉或否焉自若也至於君臣父子夫婦兄弟朋友之大經可一日離乎故曰可

離非道也其所以行之者一曰誠也誠自不欺入固當
戒慎恐懼於不見不聞之際所以養夫誠也而誠由學
始博學審問慎思明辨力行五者所以學夫誠也故曰
不明乎善不誠乎身矣聖人又懼夫貪高慕遠空談無
得也指而示之近曰不欺自妻子始身不行道不行於
妻子使身自刑家家自刑國由近以及遠由淺以至深
無駭於高無眩於奇無精粗小大之殊一於不欺而已
所以致夫誠也不欺盡誠乎曰未也無妄之謂誠不欺

其次矣今夫雷始發聲也蟄者奮萌者達譬猶啐啄相感無有先後及乎十月而雷物不與之矣故曰天下雷行物與无妄使伏羲垂唐虞之衣裳文王制周公之禮樂亦妄矣無妄盡誠乎曰亦未也無息之謂誠天一日一夜運周三百六十五度自古及今未嘗少息也天未嘗一歲誤萬物聖人未嘗一息非天道若顏子三月不違仁其與文王純亦不已則有間斷矣天道其有間乎無息盡誠乎曰亦未也贊化育之謂誠聖人盡其心以

知性盡性以盡人物之性德至乎天則鳶飛戾天德至
乎地則魚躍于淵上際下蟠無一物不得其所此成已
成物合内外之道也可以盡誠乎曰至矣未盡也抑見
而敬言而信動而變行而成猶有言動之跡在至於不
動而變不行而誠不怒而威神也不言而信天也上天
之載無聲無臭此文王之德孔子之所以為大也

庸說

易稱天尊地卑書稱天秩天序春秋書天王詩稱天生

蒸民有物有則明此道出於天皆中庸所謂庸也孟子
言經正則庶民興此孟子所傳於子思者也經即庸也
百世常行之道也親親長長尊賢貴貴而已有親親之
等尊賢之差又在夫時中而已此權所以應時變也呂
氏論之詳矣見中庸解譬猶五穀必可以療饑藥石必
可以治病今夫玉山之禾八瓊之丹美則美矣果可以
療饑乎果可以治病乎則太高難行之論其不可以經
世也亦明矣其不及者猶食糠粃而不美五穀之味也

故夫接輿之狂沮溺之狷仲子之廉師商過不及高柴之過哀宰我之短喪管仲之奢晏嬰之儉與夫非禮之禮非義之義隘與不恭皆非庸也然則夷齊非耶聖人有時乎清清而至於隘非庸也有時乎和和而至於不恭非庸也果何者為庸乎要不出乎中而已矣

和說

聖人未嘗無喜天命有德五服五章是也未嘗無怒天討有罪五刑五用是也未嘗無哀哀而不傷是也未嘗

無樂樂而不淫是也孰知夫至喜無喜天地變化草木
蕃聖人之至喜也至怒無怒鼓之以雷霆聖人之至怒
也至哀無哀寒暑不時則疾風雨不節則饑聖人之至
哀也至樂無樂鳶飛魚躍聖人之至樂也又孰知夫樂
天知命哀之大者也窮理盡性樂之極者也然則舉八
元非喜也誅四凶非怒也號泣于天非哀也被袵衣鼓
琴非樂也當理而已當理則常也何以謂之和蓋和者
因喜怒哀樂中節而名之也譬如陽并於陰則喜陰毗

於陽則怒則亦二氣之失和也聖人之心無私如天地
喜怒哀樂通四時和氣沖融於上下之間則天地安得
不位萬物安得不育四時安得不順若此者皆和之致
也

黃河九昭

并引

大安元年余出守寧邊下臨大河登高望遠超然有
懷夫崑崙之道聖源也積石迤之湫聖流也龍門企
之賢化道也仙掌躋之智通塞也屹以底柱匡失俗

也鄣以大伾避諸礙也滙以大陸鍾道粹也播以九河入聖海也授以馬圖道通天也竊以為有合吾聖人之道因作九昭思聖道之昭也非敢擬之作者姑以紓情云爾

發源

古帝賦予以正命兮湛清白之純源水涵泥而變濁兮火鬱烟而滋昏盍虛己以求復兮究大中之所存曰道有象兮無其形其下無尾兮其上無根塞汝光兮閉汝

門天而不人兮見其本源惟德人之天遊兮捷六鑿而
不渾迄反流而全一兮契妙本於崑崙

沕流

鷺鳥將擊兮形必匿霧豹養斑兮毛以澤龍蛇起陸兮
伸其屈草木黃落兮根自復水不積兮澶吾舟風不厚
兮塌吾翼氣何溲兮將雨明何長兮出日蒔吾蘭兮九
畹積吾玉兮十襲壽顏夭兮天地飽夷清兮冰雪飫道
德之源流兮導此心之積石雖不周於今之人兮吾將

付萬世兮潮汐

化道

霜降兮水歸淵潛兮天飛朝鱗兮水次夕轡兮雲達風
為翼兮雷為椎駕天吳兮從馮夷晞吾髮兮弱水濯余
翼兮咸池東風飄兮神靈雨水增波兮龍門暮謂鵲運
兮何遲謂螭騰兮何怒速莫速兮蛻骨餘樂莫樂兮縱
壑初塗人兮服儒曾行兮閔趨潔芳馨兮為佩御中直
兮為車澡身兮德淵竦轡兮雲衢登聖門而化道兮吾

將從沂泗之所居

通塞

日有光有雲翳之決之則明水有源有石礙之決之則
通噫聖道之蕪塞兮孰開明而別聰羸蹙兮劉蹶晉矇
兮魏聾求蛟螭兮木末求蚌螭兮雲中有先覺兮吾誰
適從麾韓莊之倚門兮排釋老之歸宮回狂瀾於既倒
兮鄣百川而朝東侯況侯愈曰軻曰雄同閭異實失之
相攻嗚呼聖如天王兮彼諸子者亦各諸侯與附庸無

閱牆而外禦兮是亦為大正與至公

匡俗

悲世俗之側僻兮偃規矩而詭馳擇荒途以冥行兮失
大中之所宜謂棘荆兮可履謂醢毒兮可飴曰先聖闡
興我將訂之世俗詭隘我將証之頽波委靡回而正之
吸清露以為餐兮緝雲霞以為衣御六氣以為駕兮蹇
蘭芷以為帷道莫正於仁義兮教莫先於孝慈矯末世
之頽風兮還中古之治時屹中流之砥柱兮溔萬派而

東之

避礙

世變萬殊兮不一其時道有時中兮圓方異施或邇而
通兮或直而坻尺有所不足兮寸有所宜犂牛捕鼠兮
不如狴狸大阿補履兮不如兩錢之錐申生以孝斃兮
萇弘以忠而誅夷尾生信而溺兮仲子廉而饑言不必
信兮行不必果權輕重以適道兮固無可而不可有孺
子歌曰桃花浪兮春月暮竹箭流兮三山渡雷闐闐兮

風冥冥舟楫摧兮蛟龍怒劃大岷之當前兮汨滔滔而
東驚又歌曰深則厲淺則揭兮冬日羔裘夏葛製兮遇
坎則止乘流逝兮先師有言嘆唐棣兮

鍾粹

春蘭兮紫莖秋菊兮金英折江梅兮贈所思睇荷花兮
思目成襟風兮佩月飫冰兮飽雪驂鸞兮跨鶴將以朝
兮紫闕吸沆瀣兮餐朝霞茹芝英兮服瓊芽練玉顏兮
不老潔龜腸兮無邪鍾天地之粹美兮萃日月之光華

遊道德之苑囿兮馳仁義之園林及年歲之未暮兮庶
無媿乎周任

入海

登蓬萊兮歸鰲背些明珠為宮闕紫貝些聚珍疊怪瓊
琳排些松喬偃佺戲浮彩些日月出沒歸墟會些鵬鷖
運化天地大些井蛙自囚河伯隘些九川滌源入聖海
些

通天

猗聖道之通天兮與河漢以周流浮靈槎以問津兮夕
予次夫牽牛前羲和使弭節兮後望舒以為御左列缺
之揚鞭右豐隆以持斧飛廉為先驅兮屏翳告予以未
具幹北斗以斟精兮招搖以為糈歷勾陳而入紫宮兮
聞琅琅之天語曰夫人之正心兮若北辰之居所寂然
不動即此心之太極兮以游乎萬物之祖盍求復於性
初兮執大中以為矩究性命之所極兮沂濬源於天渚
亂曰河行九區通天淵兮九疇八卦源於天兮一身動

靜一坤乾兮湛然無為守太玄兮

咏歸詞

歸去來兮風乎舞雩詠而歸既勿忘而勿助抑何喜而
何悲時未來而莫預事既往而焉追化新新而不停習
念念而覺非譬已饑而方食孰既寒而忘衣無一毫之
私意信天理之精微我思古人瞠乎若奔仰驚前軌游
心聖門習矣而察探之斯存坐見於輿飲見於樽利何
為兮樂跖善何為兮孔顏匪義路兮焉由非仁宅兮孰

安嚴三省以日儆防六欲而常關戒屋漏以慎獨尚衣
綱而中觀存夜氣之牯亡收放心而知還漸雲開而霧
廓俄鳶飛而鯢桓歸去來兮請從沂上之游悟曾點之
舍瑟終不慕兮由求既盡心而不貳亦樂天而何憂天
地均仁於萬物播一氣乎郊疇陸有下澤水有方舟野
陽浮兮藪澤光風泛兮林丘草漸漸而茁長水源源而
交流觀物態之熙熙廓予懷之休休已矣乎力天力兮
時天時我初無將亦無留捨聖道兮將安之存心以養

性守死以為期慮道學之荒蕪遂日耘而日耔廓七篇
兮孟訓咏二南兮周詩會天人而一貫窮理盡性吾何
疑

淦水集卷一

欽定四庫全書薈要卷一萬六千四十四

集部

滄水集卷二

金趙秉文撰

古賦

大椿賦

為黃太守壽公劉相甥

於此有物焉既澤而堅既蔓而延托根於無何之鄉
垂陰於不土之田祝日月而共友券宇宙而爭年歷
春秋其幾何羌不知其歲之八千端策筮之繇曰是

以江夏為鼻祖小山之外孫者耶以孝悌為根本忠
信為枝葉者耶有暉其華富文藻者耶有駢其實茂
德業者耶松茂栢悅不足以比其壽者耶愚惑不知
請以椿言

栖霞賦

送道人還山

粵有人兮襲芳華跡城郭兮志烟霞賦言歸兮杳何許
蹇遲迴兮徒延佇貝闕兮珠宮撫膝上兮絲桐高情兮

天外歸鴻靈宮兮王紀玄都兮寶藏祝君王兮萬壽侍
玉宸兮天上辱莫辱兮多憂樂莫樂兮無求望白雲兮
歸休三年胡為兮此淹留朝游兮山南暮游兮山北徙
倚兮亭上聊逍遙以終日冥坐兮清暉臨深兮翠微西
山扶兮曉釀秋水樂兮朝饑山近兮多雨雲昏昏兮承
宇烟銷兮霧散見恒茂兮遠樹樹斷兮天開鴈翩翩兮
南渡忽人歸兮鳥盡但空山兮日暮日暮兮浮雲滋目
極千里兮傷心悲山中兮人兮歸來白首不歸兮何時亂

曰山中人兮烟霞宅翠羽簾兮白玉額友麋鹿兮侶猿
雀飲清泉兮坐白石山人兮烟霞衣青天成幄兮白
露成帷風為襟兮月為佩娛清暉兮憺忘歸山中人兮
烟霞語絳霓落手兮醉毫舞蓬萊山兮在何處乘清風
兮欲歸去

繫臺賦

歲辛亥之孟冬兮余解印而南歸覽全趙之形勝兮弔
荒臺之故基太行東走以南來兮漳水改道而東馳伊

川谷之變易兮矧人事之推移獨歸然其凌空兮意神
物之所護持問父老以陳迹兮猶有雙塔野花之詩也
噫七雄擾擾虎戰以龍爭兮譬事勢於連雞或爭桑於
延敵兮有以酒薄而召圍朝膏血於秦韓之草野兮夕
暴骨於齊魏之沙陲翫生靈於刀几兮決一旦之雄雌
得地不足以贖民之命兮忍勞民而築斯方主父變服
而事威武兮固一世之雄才收中山林胡為未厭兮又
窺秦室之狼豺歸來置酒延眺八極兮俯不見蕭牆之

孕裁噫翟犬之夢兆兮讖百年之厲階何茗華之新寵
兮宴酖毒之孔懷厭離宮別館之湫隘兮起高臺之崔
嵬笑章華制度之狹陋兮又況采椽與茆階輦路縈紆
以雲竦兮閣道行空而飲霓奏金石於雲端兮悅鈞天之
夢未迴下仰望而不聞兮微風過而聲哀金輿玉輦君
王來其間兮左趙女而右吳娃朝琴夜筑為王歌舞兮
樂未極而哀隨探雀轂於離宮兮豈憶熊蟠與豹胎痛
父子斃於一朝兮人亦念骨肉之瘡痍也古往今來日

東月西驚歲華之跳丸悼興亡之奕棋歎趙國之城郭
兮變都成邑而變骨成灰慨平原之池館兮高者榛丘
下者荒陂狐兔穴於丘陵兮草木深於宮闈地荒蕪而
獸奔兮天莽蒼而鳥馳沈顧寂聽心傷思摧但聞蕭條
之聲非竹非絲迫而聽之乃在乎羽蟲之摩軋與衆竅
之喑吹也嗚呼臺向時之臺也山川花鳥亦向時之山
川花鳥也山川花鳥不能知此臺之興廢而臺亦安能
知人之悲歡而人自悲之然則靚妝炫服臺非以為榮

也而荒榛斷址臺又奚以辱為然而文王之靈臺燕昭之黃金當時稱賢者之樂後世為美談之資而是臺也蒙亡國之耻興山木之歌亦臺之不幸而堪嗤且夫今日之悲昔日之樂也騷人懷之而賦咏行客過之而噓唏嗟舊物之都盡獨天留分此臺閱千秋兮萬古作龜鑑乎方來意者使一日之樂易萬世之譏也而臺亦負於後世哉可弔而不咤也亂曰洪波之臺傷周舍於既死兮後世之君不能起廉頗於未衰干將之劍忍能誅

忠魂於李牧兮不能斷讒舌於郭開
繫梁棟兮既折嘻
大厦兮將頽非一臺足悲國無人兮吁可悲

解朝醒賦

少時所作

心怵怵兮危絃身恍恍兮風船頭岑岑其作惡神昏昏
其欲眠安得尤物之蕭爽折朝醒為可憐若夫壘金包
之嫩馨膾玉縷之芳鮮蛤酒熟而口哆蟹糟醉而臍團
皆足以扶尊前之頽玉醒座上之逃禪自蕭閒五憶之

外及涪翁與坡仙或耳目所不際蓋亦畧得而言焉又
若酪水冰融山槲凍堅剖西瓜之蜃卵烹北葵之蛟涎
亦足解五更之渴夢快一嚼於冰泉至若辣蓼之和邪
蒿之醬牛魚之醢鹿尾之漿海東頭鵞山西尾羊雉以
大保羹以秦王殿以紅腊飯以黃粱然後煎以松風蟹
眼之湯燃以清泉黃串之香已而龍巖雪谿擘烏絲而
操翰墨竹溪黃山揮玉麈而談冰霜却弓彎而謝珠貫
屏水遠與山長笑五斗於竹林追獨醒於沅湘忍然汗

出釋然病已亦可謂彼此一時跨鶴於維揚者耶

海青賦

泰和扈從春水作

霜空蕭條塞草先白海樹無枝海雲寡色黯兮遼迥風
悲日匿何驚鳥之不羣超瀚波而一息爾其俊氣橫驚
英姿傑立頂摩穹蒼翼迅東極鏤勾利觜霜排勁翮角
犀插腦細筋入骨顧盼雄毅飛騰滅沒旦寄巢於扶桑
夕刷羽於碣石於是乃命虞人遡風勢繳增設萬里足

繫一枝心折遂投軀以委命恥摧翼以喪節奚奴頭千
髯官指百時饑飽以嗾呼謹寒溫之調適臂不暇弛鈴
不停掣猶恐懷林丘夢砂磧恨身繫而子留歎雄孤而
雌隻也逮其骨肉融性情習違龍沙入閭闔蒙禁縶之
專寵叨錦韉之前席思報功於所養甘賈勇於一決既
而新陽屆候大族司月陽燄浮冰漸拆水溶溶而汎淥
驚翩翩而下唼探使星馳屬車雷發千輿隱鱗萬騎飄
瞥上將幸乎光春之中所以觀民風而宣鬱結龍旂標

而殿門敞虎旅圍而鼓聲疊忽水擊而驚飛乍雲翔而
成列玉爪翻臂錦條下繼初貼水而徐回倏干雲而上
擊雨血紛紜風毛磔裂象廣寒之舞紛霓裳之回雪似
吳宮之戰驚玉顏之喋血壯如破敵勢甚擒賊至如關
侯義勇張綱奮烈取鯨鯢於堅陣叱豺狼之當轍固亦
釋豐狐之九尾畧狡兔之三穴蓋猶賞驥足之神駿且
以勸忠於英傑也既而壽杯舉臣工悅天威暢皇恩洽
背長揚兮而趨京闕

反小山賦 并引

無塵道人李天英家海壖得小山寶而字之名曰玄
峰寢作於花陰月竇之間適甚為賦閒閒老人咲曰
是猶有所待也若知天壤間皆吾几格間一物又何
待輦石於山函花於鼎之為適哉乃為賦反之

嗟石來前孰形于鑄匪山而拳玉立巉然匪溜而涓玉
痕隱然天臺卧雲海濱藉烟幾代子寶幾姓子傳子入
吾室吾以子賢瓊花晚醉壁月夕眠我家我林吾以子

使我學我仕吾以子遷子豈吾友吾不予捐石不能對
請以臆宣自我之石幾世幾年山非吾名石豈子妍聽
其兩忘其樂也天夫鏡中之象亦水中之象餅中之泉
即澗下之泉吾豈謂寶顧陸之筆不若山林皆吾之畫
圖悅秦巴之音不若禽鳥皆吾之管絃子以心為物役
智為衆緣不知無塵之桎梏於一峰之玄也空花悞大
夫之夢庭柏証祖師之禪無一物之非我君其問諸屏
山之散仙

琅山賦

在易州境俗謂之郎君山峰巒秀拔頗似少

華

尾箕之精琳琅之英鍾奇孕秀琅山播形帝勅六丁移
來王京六鼇負背三山蓬瀛萃兮直上劍拔崢嶸表兮
獨立霜秋氣橫骨非肉附勢敵天勅呀然而門繚然而
城其門伊何竅鑿巨靈隔山見山蒼碧紛青素月夕啓
白雲晝扃其下雷峽隱隱屹屹石崖嵌空龍門天成孰

剗孰鑿不騫不騰飛泉中來華擘河傾或遡而流或迴
而泓下赴兩洪砮轟雷霆百步之外不聞人聲蘊蘊隆
隆洞潭窈冥石席可據窪尊可銘浮雲悠悠千古此情
其城伊何繚以重崕疊嶂環抱中心砥平峨峨而仙宕
宕而亭有駢斯指有植斯屏摩雲障日韜河映星千態
萬狀不可殫名李白杜陵巨然道寧九原骨醉千日豈
醒瘦武畫隱老任墨卿一朝擲筆萬里騎鯨崆峒九華
天台四明迥絕人境虛標仙經神州奧區燕南福庭可

杖可屨或仕或耕信宿陟降朝昏送迎春山水流秋空
月明巖泉夜落松風晚清游心太玄何慮何營

華山感古賦

有浮而清有濁而寧五岳奠形二華削成是其稟金天
之秀氣奄西土而作鎮包潼關以為門奄奠乎東井鷄
首之分岳之尊惟天之柱岳之作為世霖雨岳之崇三
峰如公阿衡周公承天之功厥掌伊何兩分其山聖道
通塞孟孫揚韓厥蓮伊何已瘵蠲疴上醫醫國雷扁秦

和其肅如霜其高如秋戚施伊優為山之羞若夫昔之
所謂具臣者都山岳之權竊雷雨之施壤開千里之奠
秩視三公之貴危不持而顛不扶則將焉用彼相矣且
夫安昌胡廣之保祿林甫盧杞之竊位其餘刀鋸之餘
蓋亦未足與議譬猶有干雲遏日之險而不能已山東
之亂擘山導河之力而不能鄣漁陽之騎也向者羸顛
劉蹶天崩地折九廟灰燼萬里喋血陳吳一呼殲函瓦
裂莽卓盜國內訐外掣楊李擅權幽陵竊發僖昭播遷

朱李猖獗而是山也萃寇盜之淵藪為豺狼之窟宅墜
生靈於塗炭寄性命於鋒鏑與獸為羣以巢為室以木
為衣以橡為食身為心仇形為影絕惡聞人聲愁見日
月何辜於天使至此極或曰子知其一未知其二向者
子房運籌霍光謨猷或啟其心或甚其謀祿產擅權於
呂其劉我命平勃反正而旒二豎嘯凶既唐而周我命
五龍夾日而輶潼關之敗繫尚父是賴奉天之逼惟西
平之力奮然大臣力爭而活國屹然如天柱之承西極

奈何以人事之一跌而為山靈之責有秦川胡老啟口
而笑曰有中昃月有虧盈凡一治一亂乃一昏一明福
生有基禍生有萌山有朽壤故崩四有蟲故蠹生謂山
蓋高浮雲翳之不見其形謂心至靈有物蔽之不見其
情夫惡直為求讒之媒喜譽為招佞之旌驕奢為重斂
之階好大為興戎之徵是以古之明王棄是而不營於
以忠直是旌抑讒佞之萌土木不飾杜非議之徵平刑
息冤釋吁嗟之聲含垢忍恥絕忿怒之兵夫然故心定

神休嗜欲不生禍亂不作而天下和平矣故亡漢者漢也非莽卓也亂唐者唐也非安史也使漢以秦為鑒自無兩京之亂使唐以漢為鑒又安有蜀道之竄如何以一餉之樂而忘累世之患也斯言懷古非止一時往者不可及來者猶可期耳

攘蓬賦

釋世累有遠遊兮聊逍遙以徜徉行乎莽渺之野兮歷
蒼蕪之蒼蒼攘鬪髀以睨視兮嗟遊魂之何方貴賤榮

辱杳莫訊兮奚氏族之能詳豈結纓齒劍以身殉難兮
將嬰疾之適當寧正身守道徇宮庭兮抑貪生徇欲以
自戕以天地為衾枕兮豈必厚螻蟻而薄豺狼上無君
長下無臣僕兮豈必賤奴隸而尊侯王將蟲臂鼠肝無
不可兮抑一氣頓盡死灰之不揚萬物皆出入之機兮
其孰為之主張聞風仙之高論兮曰死生之未嘗噫造
化之無窮兮何大塊之茫茫千變萬化未始有極兮如
宿債之須償老哉松而祖忍兮李探環而姓羊指後期

於源澤兮悞前生於形房曾易世而不知兮矧億劫之
能量歷萬世而一遇大聖兮然後知大夢之何傷黃帝
孔子不可問兮將質之於玉皇溘埃風予上征兮覲金
闕而朝寥陽紅雲翳其嬰音兮聞天語之琅琅曰道非
有物兮物物以彰其上無始兮其大無旁汨而真兮
道將汝昌吾以為道兮寄浩劫於延康聞至言而遂徂兮
蹇予將造乎中黃仍羽人於丹丘兮留不死之異鄉聆
古先王之高風兮屹法海之津梁促千劫於一念兮統

萬有於毫茫涉流沙而徑西極兮尋白毫之相光曰五
蘊非汝宅兮四大非汝床毋棄溟渤兮認一浮囊觀恒
河之不變兮知見性之不亡逮皮膚之脫落兮露法身
之堂堂根塵盡而性空兮泯知見而無常悟形骸之非
我兮中有不化其存者長惟聖人之達觀兮超宇宙而
高驤以陰陽為晝夜兮以死生為康莊知身外之有身
兮亦忙中之不忙混牆壁與瓦礫兮遍法界而不藏於
是體妙心玄辭喪慮忘充以法喜之食薰以知見之香

散以象外之說暢以聲前之章逍遙乎無為之業游戲
乎寂滅之場普天壤以遐觀吾又安知大小之與彭殤
也亂曰是身虛空以為量兮堅固不壞如金剛兮孰為
天壽孰否臧兮翠竹真如非青黃兮枯木龍吟非宮商
兮眼如鼻口道乃將兮

遊懸泉賦

庚午之歲九月既望趙子與客遊於承天之廢關置酒
乎妬女祠之側千山暮蒼素月如拭形與影嬉谷響互

答一談一笑超然自得既而歎曰泉不飛則無聲石不聳則無骨山以秋而殺瘦境以夜而增寂四者備矣而無勝賞以文之境雖奇而不即於是剗虵腹之枝以為琴竅鳳膺之管以為笛誦王摩詰韋蘇州之詩所以侑此觴而永今夕少焉動乎動息乎息鳴乎鳴嘿乎嘿入吾耳者瀏以清歷吾目者森以屹金鼓半空聲在峽中道娘子之關潘美所以下河東者耶旗幟盡拔春染木末突井陘之口韓信所以破趙壁者耶迫而察之風落

山而泉鳴石也二客曰未也向者泉出祠下大如車輪
下赴絕澗懸流千尺殷晴空之雷霆飛炎天之冰雪六
年於茲而閔其澤子能酌而出之亦一段之奇特趙子
曰泉有時而通亦有時而塞豈我見聞有通有塞而此
見聞復有何物鳩林道人曰物我同源動靜致一反聞
聞處聞所不及無聞之聞聞性不絕離見見處見亦不
立無見之見見亦不滅今子以耳聽聲未能眼處聞聲
以眼觀色未能耳處觀色故一泉之見為之惑也歸語

同僚曰此殆維摩詰也覺而賦之但山高水深風清月
白

無盡藏賦

出國門而南驚兮並瀘水而西馳枕房山之東麓兮面
萬頃之蒼陂得孤亭之爽塏兮納萬象而君之月娟娟
而照席兮風飄飄而吹衣悵今夕之何夕兮得二友之
追隨於是主詫客曰自有天地有此江山如我與君與
人往還向者與子仰看山俯聽泉明月侍右清風侍前

侯何啻於萬戶買不費於一錢但恐造物者之怪多取
不憂他人之我先若乃秋方半夜既寂流光潑水素彩
沈璧玉虬騰舞金波的皪披蘭泛芷紛紅獵碧送漁舟
於天末飄鄰笛於日夕洗耳盪目清魂涼魄忽然不知
風乘我而我乘風客為主而主為客也且子以為其樂
何如也雖然世有污隆物有成毀向也蕪今也芷向也
亭今也圯何變化之無常而人事之不足恃也客曰自
俗觀之有代有謝自道觀之無成無毀君亦知夫物無

常時無止乎自有觀成則有成自未有觀成則成亦壞
矣自今望昔則有昔以來望今則今亦昔矣由是觀之
方成方虧方生方死雖然此猶有心於去來現在也若
其無心則無此矣且夫水不與風期風來而水波山不
與月期月照而山白庸知夫性空真風性空真月是尚
有極耶然則聲塵有盡所以聲聲者無盡也色塵有盡
所以色色者無盡也主人喜曰今而後知乾坤一亭萬
物一藏吾廬尚無恙也

拙軒賦

宣撫伊喇公築室於私第榜之曰拙軒以告閑閑居士
曰余有拙病似愚而強矯矯亢亢踽踽涼涼人皆喜圓
已獨喜方將適東溟顧登太行將之暘谷反走寒鄉鬼
笑揶揄人怒中傷神醫不能療著蔡不能詳且子以為
何如可愈而康也居士曰拙者自拙吾不知其短巧者
自巧吾不知其長或善宦而九卿或白首而潛郎以俗
觀之有窳有良以道觀之孰否孰臧較榮枯於瞬息等

一夢於黃梁神龜曳尾大勝剗腸漢陰抱甕焉知沃湯
蜂以蜜而割蚌以珠而戕錮桓山之石豈若鷄衣之負
朝陽憶上蔡之犬何如羊裘之釣滄浪天道茫茫何有
何亡老龜不爛禍延枯桑魯酒味薄邯鄲被殃吉凶無
朕智不能量鄙夫自私虱處視襦達人大觀物我兩忘
縱心浩然與道翱翔言未既公笑曰余病良已謝夫子
之愈膏肓也

遊西園賦

九日令辰皆醉趙子獨遊西園蓋故苑同樂之地於時
天高氣清風物淒厲草綠慘以斷蔓果紅薦而脫蒂若
乃藻扃黼閣簷摧檻圯曲池荒而飛螢灌木老而雉雉
嗟物是而人非何昔榮而今悴既而登高臺俯清泚天
落鏡中水涵空際物無倒影之心水無涵空之意心與
境忘境融神會先生一笑而作渺歸鴻於天外

心靜天地之鑑賦

塵靜萬慮心涵太空廓聖賢之鑑別際天地以融通湛

一意之虛凝不膠於外極兩間而照燭盡在其中夫靜
為躁之君心者形之主無營則萬境俱達有蔽則纖毫
莫覩鑑明則塵垢不止心則喻如心靜則天地流通鑑
斯有取若乃宇則泰定神無坐馳是非不得以塵累利
害不能以物移明則遠矣鑑無近斯良以止之鍵五基
而不亂復其見也洞萬物以無遺由是照燭無疆眇綿
作炳造化無以遁其跡洪纖無以逃其影良由體道之
沖宅心以靜何思何慮守一性之宮廷不將不迎納萬

殊之光景今夫五色亂目不見泰華之形五音亂耳不聞雷霆之聲我是以神宇定兮虛而不屈心源濶兮靜之徐清天地不能外其照日月不足況其明不然曷以揚子著書云潛則神明可測莊周抗論謂虛則純白自生豈非心本一源事周萬變定而能慮則慮乃有得靜而後應則應不能眩今也守一真於不動之宅閉六欲以不關之鍵自然不慮而知不窺而見去智與故始符顏氏之齋知德與言終契孟軻之辯既而解物之懸淵

之又淵心虛則萬象皆靈欲泯則百感無朕可以游於
太始可以陶乎德元可以盪我神於八荒之表可以約
吾身於一掬之前滌玄覽於心地開虛明於性天故得
其粗則可以窮事物形名之理得其精亦有以識道德
性命之傳矣夫然物來自能順受事至不為束纏發為
用智之權救亂於未形審作研幾之妙見吉於所先別
有不定不亂而心恒如不皁不昧而用自在以虛為有
對也致虛極則無其對以靜為有待也守靜至則絕其

待功之化機之純及其至也寂照不足以名之超入圓
通之智海

淦水集卷二

謹案卷二第十六頁後二行伊喇舊作移刺今改



總校官庶吉士臣張能照
校對官編修臣周厚輅
謄錄監生臣李維翰

欽定四庫全書薈要

集部

淦水集卷三

四

詳校官助教臣謝登雋



欽定四庫全書薈要卷一萬六千四十五


集部

淦水集卷三

金 趙秉文 撰

古詩

雜擬

 變氣候大火向西流六龍整征轡倏忽夏已秋閭

闔來悲風霜稜被九州豈不念時節歲律聿其周精衛
填溟海木石安所投獨攜羨門子高步登崑丘千秋長
不老永謝區中囚

其二

朔風厲嚴氣玄雲結層陰霜雪被原野行李寒駸駸躑
躑獸強顏驚鳥辭故林路滑跼峻坂緣雲上欽崙挽藤
斷人跡反畏楚然音藜藿不充腸況乃饑飈侵開門望
晴霽白日肯照臨不憂凍餒逼所懷四海心聊興漆室
歎不待雍門琴

其三

白日淪西汜滄海無回波四時更代謝奈此遲暮何我

欲制頽光惜無魯陽戈憑高望八荒眴眴迷山河驚風
振江海山林無靜柯獸狂走四顧曠野彌絳羅西登廣
武山北顧望三河蓬蒿蔽極目人少虎狼多喟然發長
歎撫劍徒悲歌

其四

猗猗南山竹並生凡卉藂歲晏多霜雪見別蕭艾中我
欲食鷓鴣千歲不一逢留之和律呂截作嶰谷筒一變
為清商日暮來悲風清泉溉石根上有白雲封虛心抱

靜節知音為誰容不如歸去來一竿釣清澧

其五

猗猗竹與桐並生江之潯朝日照孫枝夕風振瓊林鳳
皇天外來飛下玉山岑栖枝食其實氣類無幽深夔倫
不世出斤斧倘見尋一截嶰谷管一為薰風琴偶蒙識
者賞無窮出清音

其六

九齡起韶州妻子家海潯又如帝室寶海底珊瑚金人

生有南北此道無古今迢迢龍江上鴻雁萬古心

其七

晚菊有正性託根寒水津不隨黃葉秋況爭紫蘭春依
依抱晚節冷艷排霜晨日暮碧雲滋折花思遠人鳴雁
不我待霜露日夜新願言重採摘歲晏委荆榛

其八

空齋日無事起坐橫鳴琴明月入我牖照見萬古心古
風不復還中有太古音置琴挂壁上吾道無古今

其九

戚戚去故里辛苦從軍行
黃沙翳白骨麟閣誰功名
西北秋風至日暮愁雲生
火燒白草崗水斷黃河聲
天寒馬屯縮仰天為悲鳴
男兒貴死難義重鴻毛輕
南登彫陰坂北望驃騎營
注馬千丈坡射鵬萬里程

其十

西北有高城來往交河道
古來征戰地白骨埋秋草
人壽非金石生男不待老
不敢上譙樓惟恐愁絕倒

其十一

秦時築上郡漢家事西鄙邊兵塵雨雪血漲黃河水千
秋百歲後魂魄來游此一誦古戰場悲風來萬里

澠池行

豪斟巨炙排九楹玉盤醺醖一再行秦王顧指趙王瑟
屬車天遠邯鄲城侍臣冲冠髮直指秦庭虎賁劍鋒倚咸
陽山色如死灰邯鄲霸氣清于水引車還避將軍路叢爾
那能持兩虎君不見世間男兒健如虎一旦焉知不如鼠

秋日郊行

瘦馬兀西風，節物遽如許。
雀噪晚禾場，蝶飛秋菜圃。
桑枯竅呼風，槐老皮溜雨。
聞聲不見人，隔林擗社鼓。

初望少室

好山如佳士，洗盡名利塵。
對之歛衽敬，可愛不可親。
一水刻我骨，一石融我神。
何況三十六峰，與天隣。
仰看青礧礧，俯矚白磷磷。
因之攜畫本，試寫蒼然真。
三日宿其下，低筆不敢皴。
歸來閉閣卧，枕上山橫陳。
題詩追所

見何必如古人

盧岩

龍潭下石壁鳥道盤青蒼飛泉從中來聲落讀書堂左
右灑石壁石上舍宮商尚疑盧徵君醉騎白鸞翔至今
明月夜飛下青山長去之五百載丘壑道愈光舉瓢取
此水清風益難忘

龍門

洛陽三日雨不見龍門面流水入野田歸雲抱幽巘因

尋商山眠遂就石樓飯山川宛如昔白傅不可見

過陸渾

言從陸渾去不遇紫芝還鳥飛不盡處夕陽千萬山雲
起動兼靜水流忙更閒坐待石上月滅沒烟嵐間

至日感事

人言至日一線長我覺至日一線短縫新綻舊不如昔
身上衣猶慈母線昨日日短猶可長今日衣敝不可綻
年年至日壽北堂親不在堂衣在眼

遊玉泉山

夙戒游名山出郊氣已豪薄雲不解事如妬秋山高西
風為不平約略出林梢林盡湖更寬一鏡涵秋毫披雲
冠山頂屹如戴山鼇連旬一休沐未覺陟降勞高談到
晉魏健筆凌風騷玉泉如玉人用舍隨所遭何以侑嘉
德酌我玉色醪

陪趙文侍路宣叔分韻賦雪

堂堂翰林公清癯如令威雪花對尊酒浩氣先春歸一

還天地素平盡山川
巖松竹瀉清聲窗戶明幽輝
呼童設茶具巡簷收落霏
清寒入詩腸思遠昏鴉飛
力除鹽絮俗改事文章
機後生那辨此顰眉
正宜揮請看西溪老傳著東坡衣

奇嵐賦雪分韻得素字

閉門三日雪荒城甚無趣
土屋多半頽雞犬迷牖戶
雲端高青熒天色易曛
暮寒迷日車轍清絕坤維柱
泉藏凍虺蟄松摧老蛟怒
餓鳶嚇癡雛饑鷹跡寒兔
野人市

樵蘇不辨入市路蹇驢跼峻坂愁見冰河渡陽衰理必
復天地豈終汙佇看黃雲晴飛屑落高樹

望北山雲

浮雲起太行六合須臾間清風相汲引吹我渡榆關歲
早不成雨悠然歸故山向來無心出亦復無心還

井陘韓信廟

朝涉滹沱流驅馬望太行暮投井陘宿僕痛馬玄黃地
瘠斬春色山高易夕陽暮天飛鳥盡佇立向蒼茫

花下墓

山前樹今人看花昔人墓昔人栽花待游宴花開墓上人何處今年花盡復明年今人復為後人憐酒澆墓上吃不得留與饑鴉作寒食

漸臺行

齊國有四殆漸臺空五層臺成膏血盡鬼力猶不勝浮雲一蔽臨淄君君王左右多青蠅嫠婦不恤緯杞國憂天崩任從笑掩侍人口仰天大拊列女膺一言反掌易

春風變溜澠吳楚各千里飛鳥不敢凌越以西子亡齊
以無鹽興醜興而美亡未易定愛憎請君寶此圖觀國
如延陵

秋懷次高參軍

秋風蕭條秋氣傷歲云暮矣思故鄉客行來歸正落木
雁飛不下空斜陽白草岡頭風似箭黃沙戍上月如霜
聞君近有從軍作愁思與之誰短長

三五七格

秋風清秋月明白露夜深重白雲秋晚輕夢回酒渴呼
童起枕上轆轤三五聲

倣嚴武臨邊

少年騎馬耳生風老去羞無汗馬功落日秋風心尚壯
令人回首望雲中

遊箭山

天風吹雪下平田紛紛逐馬銀杯翻馬亦喜風搖玉鐸
興來不覺過青山青山可望不可攀長河鏡裏開烟鬟

浮雲不見山頂相想是落日孤雲間
箭山峰頭望碣石
東南海水不可極赤龍賓日半海紅
長鯨駕浪掀天白
萬峰回合處九折十三盤一溪初入
山百轉萬壑度盡
松聲寒老苔萬古帶石色枯松倒植
蒼苔裂石門劃斷
一峯開猶向雲端眺青壁不見長安
許道寧披麻誰繪
倚天青又無天上謫仙金鑾客削爪
咏此晴嵐碧眼前
安得此突兀想像造化初開闢詩人
以來幾人到只說
終南與嵩少他年騎鶴歸蓬萊仰天
却笑箭山小

倣太白登覽

扁舟過海島風便一日耳咫尺不可期波濤四十里竭
來雞山下共浴桃花湯洗盡塵土骨心期水雲鄉夜夢
挂席南斗傍金山寺影水中央海雲噓蜃化樓閣撞鐘
擊鼓聞海陽施食狎鷗沾法味銜花馴鹿散天香夕陽
萬頃鵲沒處水銜天影青茫茫臨風朗咏太白句鳥飛
不盡吳天長海山道人種白玉碧眼方瞳照岩谷遺我
天書三十六模糊塵眼不可讀醉乘天上紫玉麟一問

東海青童君天風吹衣毛骨冷銀河倒浸扶桑影麻姑
兩鬢垂秋霜人間陸海變耕桑歸來笑撫靈松下春風
幾度桃花香

問山懸岩寺觀宇文公吳東山題名

幽州之鎮鑒巫閭襟帶遼碣吞玄菟誰開青壁一萬丈
坐我陸海之方壺有泉聲而飛有松實而腴雲烟出沒
隨朝鋪三百六十古精廬雲端削出金芙蓉望海寺前
列幢蓋鎮山亭上羅笙竽廣寧太守來肩輿今日之游

蓋樂乎問而不答心語口高士例與山相娛壁間題詩
六君子彷彿記是高蔡吳山僧晚壁笑問吾他山還有
此客無黃華老人醉騎驢向天亦藐懸岩圖

海月

東方雲海何所無千奇萬怪雄牙鬚風腥雨鹵懶下筋
盡與海月為僕奴滄波萬古照明月化為團團此尤物
混然別有一太虛七竅不施斤斧力不辭支解克君須
照君胸中五車書清光半食入肝肺雄文徑欲誅蟾蜍

一輪上下波心白幾誤謫仙淪醉魄為君挂席入滄海

海岳樓頭聽冰雪

海岳樓所隱

松糕

嗟嗟千歲姿不比明堂蒿膚裁三韓扇液製中山醪皮

毛剝落盡流傳到松糕髯龍脫赤鱗三日浴波濤玉兔

持玉杵搗此玄霜膏文章不

一作百

雜碎肪澤滋煎熬殷

勤小方餅裁以鞍山刀味甘剖萍實色殷煎櫻桃遼陽
富冬殖盤饌窮溪毛巧謀一飽地虀粉不我逃腹中十

八公笑汝真老饕未忘口腹累尚似賢蒸羔真休苦硬
老家風太孤高聊將酥蜜供調戲引兜曹多生根塵習
雋永勝珍庖一舌有多智無乃綿蕞勞人間無正味嗜
好隨所遭安能知許事為君續離騷

霜葉

天工設色繪雲屏山光擘破烟峯青夕陽閃閃見鴉起
晚風蕭蕭吹客醒林間老僧倚瘦藤一枝秋水冷金瓶
日暮千岩秋影裏紛紛吹落讀殘經

遊紫霞山

共聯塵外鑣薄遊西山寺夕照遶河山秋容滿天地霜
風失故綠顏色少姿媚黃花如吾衰紅葉如人醉病來
不舉酒意得同此味纍然似空尊酒盡同棄置

題大令冠軍帖

君不見長安城中永寧里玉軸牙籤散城市流傳人間
知幾姓墨蠹老蛟蟠不死怪君何處得此本上有大令
冠軍字嗚呼真贋久不辨咄咄逼人皆李衛至今淳化

二王帖多是唐人所臨硬黃紙想當盤礴下筆時睥睨
九原呼欲起以燈取影見面觀心知不言識形似長沙
無人吳郡亡後來作者不到此何必更問當年誰吾言

久已經平子

黃山云懷素所臨

人日遊西山寺觀謝章壁畫山水

蕭寺荒堂三五間謝章滿壁畫江山天涯霜雪少春意
一日攜酒開心顏饑禽穿窗啄官粟歲久剝牆樵指禿
山僧送客不關門寒雲夜夜飛來宿

倣李長吉擊球行

錦韉珠絡四百蹄繡胸嵌花雙狻猊分曹入場鼓聲作
月趁流星馬前落側身下臂疾鳥回霹靂一聲龍門開
玉鞭笑擊金鐙響綠構齊出黃金杖臨堦下馬坐廣亭
玉盤行酒跪輸朋蒼頭上馬抱黃帕一點飛塵夕陽下
歲暮言懷

歲晏多北風塞向卧南壁龜紋罽紙帳規以安我室宇
宙豈不寬盤薄入容膝窗明讀易朝月冷談道夕風箏

偶成韻一笑付終日嚴城傳夜柝曾是非戍役驚颺動
河漢原野曠蕭瑟積陰蕩寒氣歷歷星斗白龍鍾感歲
換留滯渺天北懷昔獨悲辛乾坤同寥閬

冬至

小時逢冬至夜半叩鄰里及今老無事却呼童稚起坐
深朋友敬甚矣吾衰矣笄女將及人吾衰固其理行年
四十二始有此兒子未知賢與愚懷抱差可喜嚴冬霽
霜雪風日稍清美一醉忘其家頽然枕琴几

重九登會禪寺冷翠軒

北風吹倒磨雲峰凜然雙角蟠白龍邊城雪花大如席
黃花紅葉誰為容會禪西軒作重九登高望遠開心胸
烟嵐捲盡暮山碧冷雲萬里迷玄鴻山北花豬大如馬
割鮮飲食如長虹酒酣起舞望兩寺鳥驚踏雪摧長松
天低日落望不盡一徑何處來樵蹤君不見七金山下
打圍處貂裘風帽寒蒙茸跑風駿馬下平野迎霜老兔
咻榛蕨歸來得雋託朋友臨風一飲輕千鍾歡餘勝地

兩蕭瑟百年聚散如飛蓬明朝却望登眺處城中惟見
白雲封

題東坡眉子石硯詩真蹟

東坡袖裏平原手忠義胸藏筆發之世俗卧筆取妍媚
書意乃似東鄰施何曾夢見麒麟兒天骨不如鴛鴦肥
傾囊倒軸精妙乃如此世間惟有眉子石硯吾家詩

風琴堂

我家琴寫風入松君家風琴惟隱几月明天籟自宮商

何處安排君十指風動龍吟自不知無絃底處覓成虧
世間真樂類如此但恐此聲非此耳

聽雪軒

冰花唾琅玕窗外留半月蕭然煮茶興似倩此君說玉
龍卧無力時送紙窗濕夜久沉無聲風枝墮殘雪

游崆峒山

圓方相涵浩無窮巨細長短相形中至人遺形立于獨
直與天地相始終不離汾水見姑射心知何處非崆峒

惜哉小智聞道晚強以耳目尋遺蹤去城三十里而遠
其下問道軒轅宮緣雲一徑羊角上忽然平壤羅諸峰
悄然坐我白茆堂目所未擊神已通青山為神澗水舌
賓主相對森談鋒悄中無問亦無答一墮觀聽直盲聾
何人意得乃忘象豈必日月推屯蒙參雲亭西山更好
下視落日低金容歸來秀色艷眉頰夢覺萬里西飛鴻

題楊秘監畫馬

楊侯詩人寓於畫後身韓幹前身霸驊騮萬匹落人間

一紙千金不當價曾貌先帝麝香驄紙上飛出天池龍
至今畫史比良樂一洗萬古凡馬空時于畫皮歎奇跡
二百年來無此筆艱難常恨少神駒掩圖獨抱龍媒泣
靈巖寺

泰山天下山方山屹相對何時巨鰲趾中斷神斧快遂
令齊與魯劃若中作界陽波青礧礧陰崖白皚皚衆峰
如環城盤盤一都會一徑入靈巖十里行筇籟飛泉何
處來石梁納高派金碧閎精藍未到氣先邁鐘魚集萬

指陳迹問千載何人僧伽蔡入壁了無礙鐵君豈知道
証此身不壞異類服猛逸艸木動光怪信知象教力超
越範圍外年來筆墨廢政坐耳目隘不行萬里腳恐負
三生債濟南山水窟巖寺風烟最乞我一把茅飛身入
圖畫

江岸艤舟圖

遠村樹如薺近岸舟如月孤舟泊沙尾危樯見木末前
山景氣佳日暮涼風發時有渡頭人蕭蕭吹素髮

香山飛泉亭

霜楓吹林林葉乾
泉聲落日毛骨寒
道人清曉倚闌干
自汲清泉掃紅葉
一菴冬住白雲端

東坡赤壁圖

連山盤武昌古木參雲稠
誅茆東坡下門前江水流
永懷百世士老氣益九州
平生忠義心雲濤一扁舟
笛聲何處來喚月下船頭
掬此月中水簸弄人間秋
蕩搖波中天光中失林丘
古今一俯仰共盡隨虬螭
孫曹何足

弔我自造物游尚憐風月好解與耳目謀歸來玉堂夢
清影寒悠悠一顧能幾何鶻巢奄不留遺像不忍挂尚
恐兒輩羞儼然袖雙手妙賦疑可求何時謫仙人騎鶴
下瀛洲相期游八表一洗區中愁

伯時畫九歌

楚鄉桂子落紛紛江頭日暮天無雲烟濃草遠望不盡
翩翩吹下雲中君九歌九曲送迎神還將歌曲事靈均
一聲吹入汨羅去千古秋風愁殺人

倣張志和西塞

一葉黃飛一葉舟
半竿落日半江秋
青草渡白蘋洲
歸路月明山上頭

又

白頭波上白頭人
黃葉渡西黃葉村
花幾朶酒盈尊
落日西風送到門

楊秘監秋江捕魚圖

山蒼蒼江茫茫
鳥飛不盡吳天長
潮平漲落洲渚出
秋

風幾舍鱸魚鄉漁郎聚魚鳴兩槳輕罾觸破青山浪修
鱗出水玉參差晚日搖光金蕩漾長林無聲楓葉丹清
波不動江水寒誰令此圖落塵土乃是楊侯造化之筆
端我披此圖四十載老去而今重見畫空留名字落人
間當日題詩幾人在漁人走利士走名得失與魚相重
輕笑把綸竿渺滄海浩歌直欲膾長鯨

支遁相馬圖

支郎天機深世故一馬中向來蔬筍氣寓物一洗空眼

前無騏驥遠目送歸鴻僧中有良樂萬里籛雲風

倣摩詰獨坐幽篁裏

獨坐幽林下談玄復觀易西日半銜峰返照林間石石
上多古苔山花間紅碧花落人不知山空水流出

送李按察十首

豫章蔽牛馬郢匠斧以斯太阿斷犀象補鞋不如錐君
子識其大不為流俗移青雲自茲始功業當及時

其二

全齊十萬戶繡衣付儒臣往時佩犢者今日扶犁人潛
魚游青波脫兔思荒榛賢哉渤海守盜賊皆吾民

其三

漢儒事章句去道利乃倍桓譚謂子雲此事今獨乃岱
岳小天下齊魯復向在會當登日觀一目了滄海

其四

好酒無深巷急足無善跡一偽喪百誠中和為士則澤
中一寸鏡解引萬里色往時王廣道山東化遺德

其五

堂堂竹溪翁如天有五星篆
榴深漢魏文章倣六經後
生翫華藻翫陂嬈白青
善哉劉與李斯文見典型

其六

西方有佳人貽我白玉琯
吹之和八風元氣生虛竅
翩翾兩青鳥云是王母遣
天長道路濶音信何由展

其七

皎皎霜雪練寒女機中出
織成天吳鳳被之臧獲質如

何窮鄉士九月猶絺綌不見王逸賓抱窮守空室

其八

君侯下車日百城風凜如公餘一炷香谿山奉宴居治
要無多言所貴一字虛所以曹相國不讀城旦書

其九

本心如水鏡功名時翳之少馬塵累盡萬象復在茲水
冷知天寒絃高覺柱危世無齊心友誰知此襟期

其十

二豪角談鋒氣湧胸中山達士兀無言雙手縮袖間理
勝是非遺道在禽魚閒回也真不愚高風藐難扳

春水行

先春宮外春水生鴛鴦飛下寒猶輕綠衣探使一鞭信
春風寫入鳴鞘聲龍旂曉日迎天仗小隊長圍圓月樣
忽聞疊鼓一聲飛輕紋觸破桃花浪內家最愛海東青
錦鞬掣臂翻青冥晴空一擊雪花墮連延十里風毛腥
初得頭鶩誇得雋一騎星馳薦陵寢歡聲沸入萬年觴

瓊毛散上千官髮不才無力答陽春羞作長楊侍從臣
閑與老農歌帝力歡呼一曲太平人

涿郡先主廟

炎燼終四百海飛羣雄奔蛟龍離舊隱豺虎瞰中原仗
義公天下豈料中山孫間關拒赤壁顛沛乞荆門劉郎
非嬌客肯市一女恩譬如韝上鷹既飽則飛翻山陽公
安在灑泪西南坤區區一隅地鼎立爭雄尊滅魏壯圖
屈窺吳遺恨存嗚呼永寧宮慷慨臨終言老瞞安足雄

死面醜奸魂仁與不仁耳成敗何必論天平未厭漢河
洛不足吞盜子復為盜丕乎猶子元等為一亡國善惡
終不諼

又

當時五丈原牆頭搖羽葆草木尚有情人心不如艸
懷車蓋翁三顧隆中老乾坤一草廬鼎足事已了艱危
奉命際流涕出師表一時會風雲千古事蘋藻野農復
何知尚說官家好筵卜傳神語瓦釜薦行潦瀘水耕餘

村范陽行處道天留西日遲地狹東風早風霜慘燕雁
歲月愁蜀鳥亦復梁父吟塵埃驚潦倒

扈從行

馬翻翻車轆轤塵土難分真面目年年扈從春水行裁
染春山波漾綠緣韉珠勒大羽箭少年將軍面如玉車
中小婦聽鳴鞭遙認飛塵郎馬足朝隨鼓聲起暮逐旗
尾宿樂事從今相繼躅聖皇歲歲萬機暇春水圍鷺秋
射鹿

從帥府謁太清宮

層宮枕蒼陂地迴風日冷旌旗隱復見原陸互馳騁悠
悠塵外趣窅窅壺中境山川蒸淑氣艸木閱清景周疆
有楚宋漢隸列鐘鼎尚矣千歲檜荒哉九龍井懷竒目
以擊契冥心獨省悲歡萬古促賞悟一日永清波獲魚
尾落日頰牛領天寒鷹隼擊水落鴻雁影白日照征夫
青天入漁艇洗兵江漢清茲焉事幽屏

遊醉翁亭

一徑入幽谷磴迂景更延
陽光時翳竹石色寫冷泉
不見琅瑯寺心知白雲邊
殘僧戀幽景斷臂初非禪
歲暮少風雪回祿稍擅權
海內有此亭奪去寧非天
中有不壞者斷碑猶宛然
逋民半吳越過客多幽燕
樹根落斷崖聊挂從軍鞭
鳥啼空落日野色愁寒烟
月上人歸盡山空水濺濺

陽冰篆

護書如護兒救療如救饑
可笑亦可憐似高還似癡
為

此陽水篆法傳承斯長楸感騏驥快劍斫蛟螭瑚璉
祖廟器袞冕岩廊姿夜光含圭角春水變華滋觀物獨
寫妙苦心人得知入石疑無筆妙處君猶窺廬陵千載
人歎此尤崛竒一旦隨灰燼世疑嶧山肥成壞固有數
惜哉徒爾為永成吾不預即壞那可追當其將壞間萬
一神護持一物尚不忍其餘可類推乃知放麇翁仁心
不吾欺

送墨李道士元老

嵩山到嵩陽相望三百里數月走商嶺兩岸夾伊水飛
烟空翠間前路轉多山雲橫碧嶂斷雁沒青天還鳥鳴
青山上人行修竹裏犬吠得柴荊花落鳥驚起艸荒摩
詰野火斷魯山碑昔疑王家畫今信謝公詩其中一道
士生計蒼烟壁松下讀道經窗間寫周易相看斗南北
不見十年餘重尋化鶴夢要寫換鵝書雲間侍玉皇日
下瞻天表歸去杖頭邊乾坤一壺小君歸我正病病起
霜滿鬚尚能持酒否還憶寄書無遙知鳴皋下尚有蒼

苔迹讀我往年詩因之拂塵壁

送李天英下第

天雞拂滄溟萬里起古色南風搖苦雨歸興生羽翼三
年客京華一第為親屈文字天地仇風雲囚霹靂鸞皇
望宵漢騏驥絆荆棘蹭蹬昇天行白雲係胸臆遙憐弟
妹長摩頂今過郝人生在家樂絕勝長為客老夫懷抱
惡數日卧向壁胸中畧雲夢眼底無敵國雲歸北海後
鳥沒青山夕目斷東北塵茫茫如有失

送龐才卿雨中同游太寧山

羣山西來高崔巍太寧萬疊屏風開半天截斷參井分

夕陽不到吟詩臺

寺有吟詩臺馮瀛王寓筆研於此

近都形勝甲天下

況此萬斛藏瓊瑰青蛟百道走玉骨下赴僧界如奔雷

泉聲夜作雨飛來冷雲滴破烟峰堆拍梯可望不可到

石鱗冷骨粘莓苔塔上一鈴時獨語慎勿促裝遽如許

徑須攜被上方眠明日顛崖看懸乳寺後一峯高更寒

歸來駐馬更重看蕭蕭易水寒流廣蒼茫不見雲中山

西風栗烈高陽道澹澹長空沒孤鳥荆卿廟前濕暮螢
昭王臺畔霑秋草擬豁千秋萬古愁更須一上郡城樓
西山應在闌干外注目晴空浩蕩秋

淦水集卷三